

**MALAYSIA**  
**DEWAN RAKYAT**  
**ATURAN URUSAN MESYUARAT**

**NASKHAH SAHIH/BAHASA MALAYSIA**

<http://www.parlimen.gov.my>

**HARI ISNIN, 24 MAC 2014, PUKUL 10.00 PAGI**

**Bil. 9**

---

**PERTANYAAN-PERTANYAAN BAGI JAWAB LISAN**

1. PR-1321-L61130  
**Tuan Che Mohamad Zulkifly bin Jusoh [ Setiu ]** minta **PERDANA MENTERI** menyatakan langkah Kerajaan bagi memperkasakan institusi masjid di negara ini supaya memainkan peranan bagi memangkinkan modal Islam ( Muslim ) yang berkualiti dan nyatakan program imarah masjid sebagai pusat penyebaran maklumat tepat mengenai Islam bagi membanteras gejala ajaran sesat yang kian menular dalam masyarakat.
2. PR-1321-L59672  
**Tan Sri Dato' Seri Abd Khalid bin Ibrahim [ Bandar Tun Razak ]** minta **MENTERI PERTANIAN DAN INDUSTRI ASAS TANI** menyatakan tahap kejayaan Tabung Ekonomi Kumpulan Usaha Niaga (TEKUN) dalam membantu golongan belia di Malaysia dan adakah jumlah pinjaman diberi berpadanan dengan kejayaan atau tidak memenuhi sasaran.
3. PR-1321-L61206  
**Dato' Seri Tiong King Sing [ Bintulu ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan:-
  - (a) senarai syarikat-syarikat, jumlah kuota subsidi mengikut harga/liter dan nilai kontrak *Community Drumming* yang diluluskan di seluruh Sarawak mengikut zon bagi tahun 2014; dan
  - (b) apakah garis panduan dan ketelusan pemberian kontrak tersebut dan apakah kaedah pelaksanaannya.
4. PR-1321-L60036  
**Tuan Zairil Khir Johari [ Bukit Bendera ]** minta **MENTERI PENDIDIKAN** menyatakan kos bagi perlanjutan program Mentor Bahasa Inggeris, tempoh kontrak baru, syarikat jururunding apa yang dilantik serta apakah perlanjutan program tersebut.

5. PR-1321-L60284  
**Tan Sri Datuk Seri Panglima Joseph Pairin Kitingan [ Keningau ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan sama ada pemasangan CCTV di tempat-tempat tertentu misalnya di '*vehicle parking area, housing estate*' dan tempat yang digunakan orang ramai di pekan-pekan, di pasar-pasar akan dipertimbangkan dengan serius dan bukan cadangan semata-mata.
6. PR-1321-L60212  
**Dato' Dr. Nik Mazlan bin Nik Mohamad [ Pasir Puteh ]** minta **MENTERI KERJA RAYA** menyatakan bilakah Jalan Alor Pasir ke Tok Bali akan disiapkan dan boleh digunakan awam. Berapakah kos keseluruhan projek dan kontraktor-kontraktor yang bertukar ganti.
7. PR-1321-L59450  
**Datuk Noor Ehsanuddin bin Mohd Harun Narrashid [ Kota Tinggi ]** minta **PERDANA MENTERI** menyatakan adakah Kerajaan bercadang untuk menubuhkan unit pemantau bagi memastikan maklumat kerahsiaan jabatan/negara dikawal selia dan apakah tindakan terhadap kakitangan Kerajaan jika melanggar akta kerahsiaan tersebut.
8. PR-1321-L59871  
**Dr. Ong Kian Ming [ Serdang ]** minta **MENTERI PENDIDIKAN** menyatakan mengapa *Education Malaysia Global Services (EMGS)* dibenarkan mengenakan caj sebanyak RM1000 untuk memproses setiap visa pelajar luar negara yang belajar di Malaysia walaupun KPI EMGS untuk memproses satu visa dalam masa 14 hari gagal dicapai.
9. PR-1321-L60875  
**Datuk Haji Abdul Azeez bin Abdul Rahim [ Baling ]** minta **MENTERI KEMAJUAN LUAR BANDAR DAN WILAYAH** menyatakan apakah inisiatif Kementerian dalam membantu penoreh getah di kawasan Baling daripada segi memperbaiki keperluan asas memandangkan kos sara hidup yang kian meningkat.
10. PR-1321-L60234  
**Tuan Jeff Ooi Chuan Aun [ Jelutong ]** minta **MENTERI KERJA RAYA** menyatakan tentang projek infrastruktur di persimpangan Jalan Bayan Lepas dan Jalan Permatang Damar Laut menghala ke Teluk Kumbar yang bertujuan untuk mengatasi kesesakan jalan raya sesudah pembukaan Jambatan Kedua Pulau Pinang. Berikan jadual pembangunan serta status kemajuan terkini.
11. PR-1321-L59504  
**Dato' Haji Abdul Rahman bin Haji Mohamad [ Lipis ]** minta **MENTERI PERTANIAN DAN INDUSTRI ASAS TANI** menyatakan pelan tindakan dan mekanisme untuk mengurangkan dan seterusnya menghapuskan peranan orang tengah demi memastikan harga pasaran yang lebih kondusif untuk rakyat di samping menaikkan taraf petani dan penternak ikan.

12. PR-1321-L59260  
**Tuan Wong Tien Fatt @ Wong Nyuk Foh [ Sandakan ]** minta **MENTERI KERJA RAYA** menyatakan adakah Kementerian boleh kemukakan sesalanan *feasibility study* tentang Jalan Pintas-Sandakan Fasa II, dan asas-asas yang menyokong cadangan Menteri pada 25 November 2013 di Dewan Rakyat bahawa jalan ini tidak *feasible* dan tidak diluluskan, bilakah keputusan ini dibuat, dan apakah projek-projek lain yang lebih "merupakan keutamaan".
13. PR-1321-L59841  
**Datuk Joseph Salang anak Gandum [ Julau ]** minta **MENTERI PENDIDIKAN** menyatakan adakah Kementerian bercadang untuk menutup beberapa sekolah kurang murid di pedalaman dan membangunkan sekolah yang lebih besar serta lengkap dengan semua kemudahan.
14. PR-1321-L60838  
**Tuan Chong Chieng Jen [ Bandar Kuching ]** minta **MENTERI KEWANGAN** menyatakan adakah Bank Negara membenarkan bank-bank mengenakan faedah tambahan (*penalty interest*) sebanyak 3 peratus setahun atas segala pinjaman sekiranya seseorang peminjam Bank berkenaan telah tertunggak beberapa bulan bayaran ansurannya.
15. PR-1321-L59222  
**Datuk Linda Tsen Thau Lin [ Batu Sapi ]** minta **MENTERI TENAGA, TEKNOLOGI HIJAU DAN AIR** menyatakan langkah-langkah yang diambil bagi mencegah gangguan bekalan elektrik daripada terus berulang seperti yang berlaku di seluruh negeri Sabah dan Wilayah Persekutuan Labuan pada 17 Januari 2014.
16. PR-1321-L60242  
**Tuan Haji Ahmad Lai bin Bujang [ Sibuti ]** minta **MENTERI DALAM NEGERI** menyatakan:-
- (a) adakah terdapat pegawai keselamatan terutama pihak PDRM mengalami masalah ancaman psikologi dan tekanan mental akibat daripada kesan tohmahan, tuduhan melulu dan ejekan masyarakat ketika menjalankan tugas di lapangan ; dan
  - (b) adakah terdapat butiran statistik berkenaan jumlah pegawai yang memohon untuk mendapatkan kaunseling berkaitan masalah ini.
17. PR-1321-L60010  
**Dato' Sri Liow Tiong Lai [ Bentong ]** minta **PERDANA MENTERI** menyatakan statistik bilangan pekerja sektor awam di bawah setiap suruhanjaya perkhidmatan mengikut kaum dan jantina dari tahun 2010 sehingga kini dan adakah Kerajaan akan memastikan setiap suruhanjaya perkhidmatan menepati sasaran untuk menambahkan lebih ramai pekerja pelbagai kaum.

18. PR-1321-L60441  
**Tuan Loke Siew Fook [ Seremban ]** minta **MENTERI PENDIDIKAN** menyatakan jumlah kekurangan guru di Sekolah Jenis Kebangsaan Cina (SJKC) dan Sekolah Jenis Kebangsaan Tamil (SJKT) mengikut pecahan setiap negeri yang terkini.
19. PR-1321-L61263  
**Datuk Zahidi bin Zainul Abidin [ Padang Besar ]** minta **MENTERI SAINS, TEKNOLOGI DAN INOVASI** menyatakan berapakah peruntukan yang diberikan oleh Kementerian kepada Yayasan Angkasawan Malaysia sejak ditubuhkan.
20. PR-1321-L60509  
**Tuan R. Sivarasa [ Subang ]** minta **MENTERI KESIHATAN** menyatakan jumlah pesakit yang kini menerima subsidi Kerajaan bulanan untuk rawatan dialisis dan juga rancangan Kementerian untuk tingkatkan kemudahan-kemudahan di hospital dan klinik awam untuk pesakit-pesakit dialisis yang jumlahnya makin meningkat dan tidak mampu membayar kadar swasta.
21. PR-1321-L60865  
**Dr. Ko Chung Sen [ Kampar ]** minta **MENTERI KEWANGAN** menyatakan:-
  - (a) harga yang dibayar untuk dua buah kereta Proton Perdana edisi khas yang baru untuk Perdana Menteri dan Timbalan Perdana Menteri; dan
  - (b) kos untuk membeli 200 buah Proton Perdana yang pertama dan juga bagi jumlah 3000 buah kereta Proton Perdana yang akan dibeli oleh Kerajaan menjelang dua tahun akan datang.
22. PR-1321-L60189  
**Dato' Kamarudin bin Jaffar [ Tumpat ]** minta **MENTERI LUAR NEGERI** menyatakan apakah dasar tindakan Kerajaan terhadap pembunuhan berleluasa orang Islam di *Central African Republic (CAR)*.
23. PR-1321-L59708  
**Dato' Ar. Wan Mohammad Khair-il Anuar bin Wan Ahmad [ Kuala Kangsar ]** minta **MENTERI DALAM NEGERI** menyatakan tahap pelaksanaan program Bandaraya Selamat di seluruh negara pada masa ini dan apakah peranan yang dimainkan oleh anggota Polis DiRaja Malaysia (PDRM) dalam mempertingkatkan tahap keselamatan dalam program tersebut.
24. PR-1321-L61149  
**Dato' Abdul Manan bin Ismail [ Paya Besar ]** minta **MENTERI DALAM NEGERI** menyatakan jumlah rakyat asing yang ditangkap bekerja sebagai tukang urut, pelayan pelanggan (GRO) dan aktiviti pelacuran serta senaraikan rakyat asing yang ditangkap itu mengikut negara masing-masing pada tahun 2010, 2011, 2012, 2013 dan tiga bulan pertama tahun 2014.

25. PR-1321-L60003  
**Datuk Sapawi bin Ahmad Wasali [ Sipitang ]** minta **MENTERI KERJA RAYA** menyatakan status terkini pelaksanaan projek Pan-Borneo khususnya membabitkan laluan dari sempadan Sabah-Sarawak di Lawas/Sindumin hingga ke Kota Kinabalu.
26. PR-1321-L60381  
**Tuan Nik Mohamad Abduh bin Nik Abdul Aziz [ Pasir Mas ]** minta **MENTERI KOMUNIKASI DAN MULTIMEDIA** menyatakan tindakan Kementerian untuk menangani kejadian kegagalan sistem komunikasi akibat daripada bencana alam.
27. PR-1321-L59757  
**Tuan Anyi Ngau [ Baram ]** minta **MENTERI DALAM NEGERI** menyatakan apakah tindakan yang diambil oleh pihak Kementerian terhadap pemohon kad pengenalan yang disahkan bukan warganegara khususnya individu yang memohon dengan Unit Khas Bergerak Jabatan Pendaftaran Negara di kawasan Baram.
28. PR-1321-L59270  
**Datuk Juslie bin Ajirol [ Libaran ]** minta **MENTERI PELANCONGAN DAN KEBUDAYAAN** menyatakan jumlah pelancong asing dan pelancong domestik yang mengunjungi negeri Sabah bagi tempoh suku pertama tahun ini sempena Tahun Melawat Malaysia 2014.
29. PR-1321-L61045  
**Datuk Haji Datu Nasrun bin Datu Mansur [ Silam ]** minta **MENTERI PERDAGANGAN ANTARABANGSA DAN INDUSTRI** menyatakan pendirian Kementerian berkenaan TPPA terhadap inti pati perjanjian yang boleh mencabar kedaulatan negara Malaysia dan menyekat ruang pembuatan dasar oleh Kerajaan melalui klausa "*Investor-To-State Dispute Settlement (ISDS)*" dan "*State-To-State Dispute Settlement (SSDS)*".
30. PR-1321-L59149  
**Dr. Che Rosli bin Che Mat [ Hulu Langat ]** minta **MENTERI TENAGA, TEKNOLOGI HIJAU DAN AIR** menyatakan contoh-contoh Bangunan Kerajaan dan Industri yang melaksanakan prinsip Penyelarasan Bangunan LEO (*Low Energy Office*) serta jumlah penjimatan tahunan.
31. PR-1321-L59888  
**Datuk Ahmad Jazlan bin Yaakub [ Machang ]** minta **MENTERI PENDIDIKAN** menyatakan apakah kesan jangka pendek dan panjang yang bakal diterima oleh rakyat dan negara secara keseluruhannya apabila Kerajaan mengumumkan untuk menambah bilangan kemasukan mahasiswa Bumiputera ke UiTM menjelang tahun 2020.
32. PR-1321-L60949  
**Tuan Wong Sze Phin @ Jimmy [ Kota Kinabalu ]** minta **PERDANA MENTERI** menyatakan statistik Keluaran Dalam Negeri Kasar (KDNK) mengikut sektor dari tahun 2009 hingga 2013 bagi setiap negeri di Malaysia.

33. PR-1321-L60496  
**Dato' Noraini binti Ahmad [ Parit Sulong ]** minta **PERDANA MENTERI** menyatakan apakah Petunjuk-petunjuk Prestasi Utama (KPI) yang ditetapkan oleh Kerajaan kepada TERAJU dalam memperkasa ekonomi Bumiputera dan jangka masa pencapaian bagi setiap KPI tersebut.
34. PR-1321-L59859  
**Tuan Oscar Ling Chai Yew [ Sibü ]** minta **MENTERI PERTAHANAN** menyatakan sebab kapal rondaan tidak dibina di Sibü, kerana di Sibü mempunyai '*shipyard*' yang berkemampuan. Senaraikan jenis kapal rondaan yang dibina tempatan dan kosnya.
35. PR-1321-L59128  
**Dato' Wira Othman bin Abdul [ Pendang ]** minta **PERDANA MENTERI** menyatakan apakah SPRM mempunyai pasukan penyiasat khas seperti *special branch* untuk membuat pengintipan terhadap kegiatan rasuah yang buruk di semua peringkat dalam negara atau hanya bergantung kepada laporan sahaja.
36. PR-1321-L61057  
**Dato' Ahmad Fauzi bin Zahari [ Setiawangsa ]** minta **PERDANA MENTERI** menyatakan adakah sebarang perancangan dari pihak Kementerian untuk mempertimbangkan rebat atau diskaun kepada pengguna Kad Rapid bagi penggunaan pengangkutan awam pada waktu puncak bagi membantu mengurangkan kos sara hidup rakyat.
37. PR-1321-L60913  
**Tuan Haji Nasrudin bin Hassan [ Temerloh ]** minta **MENTERI PENDIDIKAN** menyatakan jumlah graduan pra pendidikan sekolah dari tahun 2010 hingga 2013 yang telah bekerja dalam bidang berkenaan.
38. PR-1321-L60157  
**Dato' Seri Anwar bin Ibrahim [ Permatang Pauh ]** minta **PERDANA MENTERI** menyatakan pendirian Kabinet berhubung cadangan Konsensus Nasional bagi mengatasi permasalahan perkauman, jenayah dan ekonomi yang melanda negara.
39. PR-1321-L59981  
**Tuan Charles Anthony Santiago [ Klang ]** minta **MENTERI PERDAGANGAN ANTARABANGSA DAN INDUSTRI** menyatakan jaminan Kementerian bahawa kos ubat (*medicine*) tidak akan naik disebabkan oleh Perjanjian Perdagangan Bebas TPPA dan EU-Malaysia.
40. PR-1321-L60869  
**Dr. Ko Chung Sen [ Kampar ]** minta **PERDANA MENTERI** menyatakan:-
- (a) bilangan orang bukan Islam yang memeluk agama Islam dalam tempoh 10 tahun yang lepas ; dan
  - (b) bilangan orang Muslim Melayu yang keluar dari Islam dalam tempoh 10 tahun yang lepas.

41. PR-1321-L59197  
**Tuan Idris bin Haji Ahmad [ Bukit Gantang ]** minta **MENTERI DALAM NEGERI** menyatakan berapakah bilangan Pendatang Tanpa Izin (PATI) yang ditangkap oleh pihak berkuasa sehingga Feb 2014 dan berapa bilangan majikan yang ditangkap kerana melindungi PATI.
42. PR-1321-L60686  
**Ust. Dato' Dr. Mohd. Khairuddin bin Aman Razali [ Kuala Nerus ]** minta **MENTERI KEMAJUAN LUAR BANDAR DAN WILAYAH** menyatakan masalah pembekalan air bersih di kawasan luar bandar seluruh negara.
43. PR-1321-L59188  
**Dato' Dr. Mujahid Yusof Rawa [ Parit Buntar ]** minta **PERDANA MENTERI** menyatakan prestasi Bahagian Pembangunan Komuniti (BPK) untuk memastikan perpaduan dan integrasi nasional dapat dijayakan.
44. PR-1321-L61232  
**Puan Hajah Zuraida binti Kamaruddin [ Ampang ]** minta **MENTERI KESIHATAN** menyatakan secara terperinci tentang kajian Skim 1Care setakat ini dan bilakah Kementerian akan melaksanakan skim tersebut.
45. PR-1321-L59469  
**Tuan Seah Leong Peng [ Telok Intan ]** minta **MENTERI DALAM NEGERI** menyatakan sehingga kini bagaimana keberkesanan PDRM dalam menangani kes jenayah berat hasil daripada pewujudan semula undang-undang pencegahan, penubuhan pasukan *Task Force* dan juga kawalan ketat yang dilakukan di sempadan Malaysia - Thailand.
46. PR-1321-L59335  
**Tuan Masir Kujat [ Sri Aman ]** minta **MENTERI KOMUNIKASI DAN MULTIMEDIA** menyatakan bilakah program pemasangan WiFi diberi di kawasan Lachau. Berapakah jumlah WiFi yang telah dipasang di Parlimen Sri Aman.
47. PR-1321-L59218  
**Dato' Haji Mohd Zaim bin Abu Hasan [ Parit ]** minta **MENTERI KESIHATAN** menyatakan:-
- (a) berapakah jumlah pesakit warga asing yang telah dikenal pasti membawa pelbagai penyakit berjangkit ke Malaysia mengikut tahun semenjak tahun 2008 hingga sekarang; dan
  - (b) berapakah jumlah kos perbelanjaan yang terpaksa ditanggung kerajaan dalam mengurus isu ini.
48. PR-1321-L59340  
**Datuk Koh Nai Kwong [ Alor Gajah ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah tindakan yang akan diambil oleh Kementerian untuk membantu golongan berpendapatan rendah yang kekurangan sumber kewangan dan tidak mampu memperoleh kemudahan pinjaman bank untuk memiliki rumah mampu milik.

49. PR-1321-L60878  
**Dr. Ko Chung Sen [ Kampar ]** minta **MENTERI PENGANGKUTAN** menyatakan:-
- (a) bilangan motokar di jalan raya dan peratusan motokar ini yang lebih tua daripada 10 tahun, 20 tahun, dan 30 tahun bagi tempoh 5 tahun yang lepas; dan
  - (b) peratusan kemalangan yang melibatkan motokar yang lebih tua daripada 10 tahun, 20 tahun dan 30 tahun.
50. PR-1321-L60340  
**Puan Siti Zailah binti Mohd Yusoff [ Rantau Panjang ]** minta **PERDANA MENTERI** menyatakan cadangan penambahbaikan terhadap perkhidmatan KTM ke Pantai Timur. Apakah hasil kajian terhadap penggunaan jambatan kereta api di seluruh negara, apakah jaminan keselamatannya serta berapa tahun tempoh jangkaan keselamatannya untuk masa depan penggunaannya akan datang.
51. PR-1321-L60471  
**Tuan Ignatius Dorell Leiking [ Penampang ]** minta **MENTERI KERJA RAYA** menyatakan masa yang diperlukan untuk memproses dan meluluskan sebarang permohonan peruntukan daripada Kementerian Kerja Raya Pusat untuk membaiki jalan raya-jalan raya yang rosak di setiap daerah di negeri Sabah yang diajukan oleh Pengarah Jabatan Kerja Raya Negeri Sabah.
52. PR-1321-L60986  
**Puan Kasthuriraani a/p Patto [ Batu Kawan ]** minta **MENTERI DALAM NEGERI** menyatakan sama ada NGO Majlis Jemaah Islam dalam perhimpunan untuk menampar seorang wanita, Teresa Kok telah memberi notis 10 hari sebelum perhimpunan tersebut dan jika ia, di mana ia diberikan dan di mana buktinya.
53. PR-1321-L60834  
**Datuk Rozman bin Isli [ Labuan ]** minta **MENTERI PENGANGKUTAN** menyatakan adakah perancangan untuk meningkatkan kapasiti Pelabuhan Labuan pada masa terdekat ini. Ini kerana, Pelabuhan Labuan pada masa ini mempunyai kapasiti yang sangat rendah dibandingkan dengan permintaan terutamanya daripada industri minyak dan gas yang sebenarnya adalah 80 peratus pengguna perkhidmatan pelabuhan tersebut.
54. PR-1321-L60190  
**Tuan Sim Tze Tzin [ Bayan Baru ]** minta **PERDANA MENTERI** menyatakan apakah status terkini rancangan penswastaaan Pelabuhan Pulau Pinang. Bilakah perjanjian akan ditandatangani. Apakah rasional penswastaaan ini dijalankan dan apakah kebaikan dan keuntungan kepada Kerajaan dan orang Pulau Pinang.



55. PR-1321-L60080  
**Tuan Nga Kor Ming [ Taiping ]** minta **MENTERI PELANCONGAN DAN KEBUDAYAAN** menyatakan jumlah bilangan pelancong luar negara yang datang melawat Malaysia mengikut negara masing-masing dari 2010 hingga 2014 serta cara dan kos terlibat untuk mempromosikan industri pelancongan negara tahun ini.
56. PR-1321-L61006  
**Tuan Shamsul Iskandar bin Mohd Akin [ Bukit Katil ]** minta **MENTERI DALAM NEGERI** menyatakan status terkini siasatan kes tembakan maut oleh anggota Polis Diraja Malaysia terhadap seorang awam di Machap Umboo, Melaka pada 7 Februari 2014 termasuk kemungkinan anggota berkenaan digantung tugas.
57. PR-1321-L60572  
**Datuk Hajah Norah binti Abd Rahman [ Tanjong Manis ]** minta **PERDANA MENTERI** menyatakan adakah JAKIM telah membangunkan satu standard untuk analisa dan pengesahan (*verification*) status halal untuk vaksin produk farmaseutikal secara terperinci memandangkan terdapat banyak vaksin dan produk farmaseutikal yang diimport memerlukan status halal bagi kegunaan umat Islam di Malaysia.
58. PR-1321-L59680  
**Dato' Ir. Haji Nawawi bin Ahmad [ Langkawi ]** minta **MENTERI PERTAHANAN** menyatakan apakah ada perancangan Kerajaan untuk mewujudkan satu akta yang mewajibkan penduduk Malaysia khususnya lelaki, untuk menyertai pasukan tentera selama sekurang-kurangnya 1 tahun agar kecintaan kepada negara kita Malaysia dapat dipertingkatkan.
59. PR-1321-L60424  
**Tuan Ahmad Marzuk bin Shaary [ Bachok ]** minta **MENTERI DALAM NEGERI** menyatakan jumlah operasi dan jumlah jam sekatan jalan raya yang telah dibuat sepanjang 2011, 2012 dan 2013 di daerah Bachok. Nyatakan hasil yang diperoleh melalui sekatan jalan raya. Apakah peraturan yang ditetapkan dalam melakukan sesuatu sekatan jalan raya.
60. PR-1321-L60362  
**Dr. Mohd Hatta bin Md. Ramli [ Kuala Krai ]** minta **PERDANA MENTERI** menyatakan natijah perundangan yang akan berlaku jika proses persempadanan semula kawasan pilihan raya tidak dapat diselesaikan pada tahun 2014.
61. PR-1321-L60112  
**Tuan Hee Loy Sian [ Petaling Jaya Selatan ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan alasan mengapa insinerator yang dibina di Langkawi, Tioman, Pangkor dan Cameron Highlands masih belum beroperasi sepenuhnya sehingga sekarang.

62. PR-1321-L60483  
**Dato' Johari bin Abdul [ Sungai Petani ]** minta **MENTERI DALAM NEGERI** menyatakan:-
- (a) berapa jumlah dadah dalam nilai RM yang dirampas pada tahun 2012 dan pada tahun 2013. Jika ada peningkatan, apakah sebab peningkatan tersebut terjadi; dan
  - (b) daripada semua dadah yang dirampas berapa peratus yang dimusnahkan dan bagaimana kaedah dadah tersebut dimusnahkan. Jika ada yang disimpan, kenapa ia disimpan dan di mana dadah-dadah ini disimpan.
63. PR-1321-L61071  
**Tuan Wong Chen [ Kelana Jaya ]** minta **MENTERI KEWANGAN** menyatakan jumlah hutang dan pinjaman (termasuk bon) 1MDB sehingga 1 Januari 2014 dan untuk menerbitkan butiran-butiran hutang dan pinjaman tersebut.
64. PR-1321-L60696  
**Datuk Jumar bin Idris [ Sepanggar ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan:-
- (a) berapakah bilangan Balai Bomba di Negeri Sabah dan benarkah negeri Perak mempunyai lebih banyak balai bomba berbanding negeri Sabah; dan
  - (b) tidak adakah sebarang usaha untuk menambah bilangan anggota bomba dan balai bomba di negeri Sabah ini dalam masa yang terdekat.
65. PR-1321-L60771  
**Tuan Lim Kit Siang [ Gelang Patah ]** minta **MENTERI DALAM NEGERI** menyatakan jumlah tindakan polis yang telah diambil terhadap mereka yang mencetuskan kebencian, konflik dan ketegangan kaum dan agama dengan tujuan mewujudkan ketidakharmonian dan permusuhan antara kaum dan antara agama, dan mengapakan nampaknya sesetengah orang berkenaan menikmati kekebalan dan kebebasan untuk melakukan hasutan.
66. PR-1321-L60327  
**Tuan Haji Khalid bin Abdul Samad [ Shah Alam ]** minta **PERDANA MENTERI** menyatakan apakah impak isu Syiah yang dihangat-hangatkan oleh Kerajaan kepada projek PETRONAS di Iraq dan negara-negara Arab lain.
67. PR-1321-L59372  
**Tuan William Leong Jee Keen [ Selayang ]** minta **MENTERI DALAM NEGERI** menyatakan langkah-langkah yang diambil untuk memperbaiki kedudukan kebebasan akhbar Malaysia di tangga ke-147 daripada 180 di Indeks Kebebasan Akhbar Dunia 2014.

68. PR-1321-L60795  
**Tuan Chua Tian Chang @ Tian Chua [ Batu ]** minta **MENTERI DALAM NEGERI** menyatakan berapa orang asing ditahan atau didakwa di Malaysia terhadap sekatan perdagangan Amerika Syarikat terhadap Iran. Apakah tindakan Kerajaan untuk permintaan menyerahkan semua suspek yang dikehendaki Amerika Syarikat.
69. PR-1321-L59284  
**Dato' Kamarul Baharin bin Abbas [ Telok Kemang ]** minta **PERDANA MENTERI** menyatakan:-
- (a) cara mana Malaysia Biomass Initiative melalui MYBiomass dapat meningkatkan faedah atau keuntungan pengeluaran barangan teknologi hijau yang akan melonjakkan negara ke tahap berpendapatan tinggi; dan
  - (b) apakah projek-projek yang telah terlaksana dan dirancang serta jumlah pelaburan untuk mencapai matlamat ini.
70. PR-1321-L61102  
**Dr. Azman bin Ismail [ Kuala Kedah ]** minta **MENTERI PERTANIAN DAN INDUSTRI ASAS TANI** menyatakan rasional pihak Kementerian menetapkan RM 1200 satu tan metrik sebagai harga padi. Asas apakah yang diguna pakai.
71. PR-1321-L60939  
**Datuk Dr. Haji Abd. Latiff bin Haji Ahmad [ Mersing ]** minta **PERDANA MENTERI** menyatakan apakah peranan yang telah dimainkan oleh Panel-panel bebas SPRM dalam memastikan SPRM melaksanakan tugas dan peranannya secara bebas dan berkesan untuk mencegah jenayah rasuah, salah guna kuasa dan penyelewengan di negara ini.
72. PR-1321-L59531  
**Tuan Lim Guan Eng [ Bagan ]** minta **PERDANA MENTERI** menyatakan status Pelabuhan Pulau Pinang dan mengapakah tidak ada sebarang pengumuman tentang pengambilan operasinya oleh Johor Seaport Terminal pada Januari 2014 tentang kosnya, tempohnya, jumlah pelaburan dan adakah syarat-syarat termasuk menyegerakan projek pengorekan dasar laut kepada 15 meter sebanyak RM353 juta.
73. PR-1321-L61094  
**Datuk Haji Shabudin bin Yahaya [ Tasek Gelugor ]** minta **MENTERI DALAM NEGERI** menyatakan apakah perancangan Kerajaan bagi mengawal perbuatan memburuk-burukkan Kerajaan serta perbuatan mencetus ketegangan kaum dan agama dan lain-lain lagi supaya ia tidak merosakkan negara.
74. PR-1321-L60287  
**Tuan Wan Hasan bin Mohd Ramli [ Dungun ]** minta **MENTERI DALAM NEGERI** menyatakan jumlah PATI yang ditahan dalam Ops Bersepadu di setiap depot tahanan dengan perbelanjaan RM16 juta makan dan RM3 juta bagi penghantaran balik ke negara asal pada tahun 2013 mengikut negara PATI berkenaan.

75. PR-1321-L60310  
**Dato' Ngeh Koo Ham [ Beruas ]** minta **MENTERI PERUSAHAAN PERLADANGAN DAN KOMODITI** menyatakan langkah-langkah yang diambil oleh Kementerian untuk memastikan industri kelapa sawit di Malaysia akan dapat terus bersaing dengan negara lain seperti Indonesia yang mempunyai kos tenaga buruh yang lebih rendah.

**PADA PERMULAAN URUSAN MESYUARAT**  
**MENGEMUKAKAN RANG UNDANG-UNDANG KERAJAAN**  
**UNTUK BACAAN KALI YANG PERTAMA**

1. **Menteri Kewangan**

- \* Rang Undang-undang Perbekalan Tambahan (2013) 2014

---

\*Menandakan bahawa Rang Undang-undang ini akan di bawa pada semua peringkat di mesyuarat ini.

### **ATURAN URUSAN MESYUARAT DAN USUL-USUL**

1. **Usul dibuat oleh Yang Berhormat Tan Sri Datuk Seri Utama Shahrir bin Abdul Samad (Johor Bahru)** dan masalah dicadangkan :-

“Bahawa suatu ucapan yang tidak sepertinya dipersembahkan kepada Seri Paduka Baginda Yang di-Pertuan Agong, demikian bunyinya:-

“ Ampun Tuanku,

Patik, Yang di-Pertua dan Ahli-ahli Dewan Rakyat Malaysia di dalam Persidangan Parlimen, memohon ampun mempersembahkan suatu ucapan yang ikhlas daripada Majlis Dewan Rakyat mengucapkan berbanyak-banyak syukur dan menjunjung kasih kerana Titah Ucapan Seri Paduka Baginda semasa membuka Penggal Kedua, Parlimen Yang Ketiga Belas.”

#### **Menyambung semula Perbahasan atas masalah (20 Mac, 2014)**

2. (D.R. 23/2013) Rang Undang-undang Saraan Hakim **Bacaan Kali**  
(Pindaan) 2013 **Yang Kedua**

#### **[ Menteri di Jabatan Perdana Menteri ]**

3. (D.R. 13/2013) Rang Undang-undang Bahan-bahan “  
Kakisan dan Letupan dan Senjata  
Berbahaya (Pindaan) 2013

#### **[ Menteri Dalam Negeri ]**

4. (D.R. 24/2013) Rang Undang-Undang Pencegahan “  
Pengubahan Wang Haram dan  
Pencegahan Pembiayaan Keganasan  
(Pindaan) 2013

#### **[ Menteri Kewangan ]**

5. **Menteri Kewangan akan mencadangkan:-**

“Bahawa Dewan ini, mengikut peruntukan di bawah Seksyen 5 Akta Persatuan Pembangunan Antarabangsa 1960, mengambil ketetapan supaya Malaysia membuat sumbangan kepada Program Penambahan Dana Ke 17 Persatuan Pembangunan Antarabangsa sebanyak USD27,000,000.00 (dua puluh juta sahaja)”.

6. PR-1321-U59393

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, rakyat pada keseluruhannya berbesar hati dan mengalu-alukan usaha kerajaan dalam menangani masalah jenayah di negara ini dengan menubuhkan satu jabatan khusus dalam institusi kepolisan iaitu Jabatan Pencegahan dan Pembanterasan Jenayah Polis DiRaja Malaysia.

Dan mengambil maklum juga, bahawa umum mengetahui bahawa Jabatan Pencegahan dan Pembanterasan Jenayah PDRM ini hanya berfungsi di peringkat Ibu Pejabat Bukit Aman sahaja dan keanggotaannya amat terhad.

Dan mengambil maklum juga bahawa, kekangan yang dihadapi oleh JPPJ dan PDRM ini adalah disebabkan oleh kelewatan pihak Suruhanjaya Perkhidmatan Awam dalam memproses keperluan bagi perjawatan dan mengisi perjawatan dalam JPPJ-PDRM.

Dan mengambil maklum juga bahawa, rakyat dan masyarakat menaruh harapan serta kepercayaan penuh bahawa dengan tertubuhnya JPPJ-PDRM ini, kadar jenayah di negara ini akan dapat diturunkan pada kadar minima dan sekali gus menjadikan kebolehpercayaan rakyat mengenai dengan keselamatan negara ditingkatkan.

Maka, bagi menangani masalah yang dihadapi oleh JPPJ-PDRM ini, Dewan ini hendaklah mengambil ketetapan bahawa, pihak kerajaan hendaklah dalam kadar segera mendesak pihak Suruhanjaya Perkhidmatan Awam Malaysia untuk segera menyediakan perjawatan bagi semua jawatan yang diperlukan dalam Jabatan Pencegahan dan Pembanterasan Jenayah Polis DiRaja Malaysia, supaya jabatan ini dapat ditubuhkan di semua peringkat, iaitu peringkat Pusat Bukit Aman, peringkat Ibu Pejabat Polis Kontinjen dan Ibu Pejabat Polis Daerah, agar fungsinya sebagai Agensi Pencegahan dan Pembanterasan Jenayah dapat dilaksanakan dengan jayanya."

**( Perdana Menteri )**

7. PR-1321-U59394

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, sejak tertubuhnya Kawasan Keselamatan Khas Pantai Timur Sabah - ESSCOM, aliran keluar masuk pendatang asing kenegara ini, kini boleh dipantau sebanyak-sedikit.

Dan mengambil maklum juga, bahawa kawasan ESSCOM ini masih belum kebal-tembus oleh penceroboh asing yang selalu mengganggu-gugat keselamatan dan kedaulatan negara. Dan mengambil maklum juga bahawa, dengan aset sedia ada, kerja-kerja pengawasan dan perlindungan kawasan ESSCOM yang panjangnya sejauh 1400 kilometer amatlah rumit.

Dan juga mengambil maklum bahawa, pengendalian dan kos operasi aset-aset ESSCOM sedia ada amatlah tinggi dan bagi sesetengah situasi, agak merbahaya bagi anggota yang terlibat. Maka, bagi menangani masalah pengawasan dan perlindungan kawasan ESSCOM ini, dewan ini hendaklah mengambil ketetapan bahawa, selain dengan aset sedia ada, kerajaan hendaklah menggunakan khidmat kenderaan udara tanpa pemandu (*drone - unmanned aerial vehicle*) terutama sekali bagi menjalankan kerja-kerja pengawasan perairan ESSCOM."

**( Perdana Menteri )**

8. PR-1321-U59409

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, kedai rakyat 1Malaysia - KR1M menawarkan harga barangan 30% - 40% lebih murah berbanding dengan kedai biasa. Dan mengambil maklum juga, bahawa hasrat murni kerajaan untuk mengurangkan bebanan kos sara hidup rakyat ini amatlah disanjung tinggi dan seharusnya dinikmati oleh semua lapisan rakyat terutama sekali mereka yang berpendapatan rendah jauh di pedalaman.

Dan mengambil maklum juga bahawa, hampir semua KR1M terletak di pekan-pekan utama terutama sekali di negeri Sabah. Kedudukan ini serba-sedikit membantutkan usaha kerajaan untuk mengurangkan beban kos sara hidup kumpulan sasar - kumpulan berpendapatan rendah, dari segi kebolehcapaian pengguna. Misalnya, adalah tidak praktikal bagi pengguna untuk ke pekan hanya untuk membeli sekilo tepung.

Dan mengambil maklum juga bahawa, hasrat kerajaan dalam menubuhkan KR1M ini boleh dipanjangkan lagi dengan konsep merakyatkan KR1M. Yakni pihak KR1M bolehlah menyediakan perkhidmatan jurujual dengan menggunakan van atau pun lori, di mana jurujual ini akan masuk ke seluruh kedai-kedai runcit yang terdapat di kampung-kampung, mukim dan sebagainya bagi membekalkan produk KR1M.

Dengan kaedah ini, produk KR1M dapat di boleh-capai oleh semua lapisan rakyat Malaysia. Maka, bagi memenuhi hasrat kerajaan dalam penubuhan KR1M, dewan ini hendaklah mengambil ketetapan bahawa, pihak kerajaan hendaklah memperluaskan lagi kebolehcapaian KR1M dengan memperluaskan pasaran produk KR1M melalui kaedah di atas."

**( Menteri Perdagangan Dalam Negeri, Koperasi Dan Kepenggunaan )**

9. PR-1321-U59411

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, Sekolah Rendah Jenis Kebangsaan Hwa Shiong Putatan terletak berhampiran dengan Lebuhraya Putatan - Papar.



Dan mengambil maklum juga, bahawa sekolah ini menempatkan lebih daripada 700 orang murid sekolah di mana lebih daripada 50% murid ini akan menyeberang Lebuhraya Putatan - Papar, bagi tujuan menaiki bas, kereta atau pun berjalan kaki untuk pergi dan pulang ke sekolah.

Dan mengambil maklum juga bahawa, lintasan ini juga digunakan oleh orang ramai.

Dan mengambil maklum juga bahawa, selain Lebuhraya Putatan - Papar, murid-murid SRJKC Hwa Shiong dan orang ramai juga kena melintasi laluan kereta api bagi tujuan urusan harian mereka. Maka, atas faktor keselamatan, Dewan ini hendaklah mengambil ketetapan bahawa, pihak Kerajaan hendaklah mendirikan jejantas pejalan kaki, menyeberangi rel kereta api dan Lebuhraya Putatan – Papar Berhadapan dengan SRJKC Hwa Shiong demi untuk keselamatan murid-murid sekolah dan orang awam."

**( Menteri Kerja Raya )**

10. PR-1321-U60274  
**Dr. Tan Seng Giaw [ Kepong ]** akan mencadangkan:-

"Bahawa Dewan ini membahaskan langkah-langkah yang boleh memperkukuhkan keamanan dan perpaduan negara majmuk ini".

**( Perdana Menteri )**

11. PR-1321-U60276  
**Dr. Tan Seng Giaw [ Kepong ]** akan mencadangkan:-

"Bahawa Dewan ini membincangkan projek memperbaiki Dewan yang bocor, tempoh yang diperlukan dan jumlah perbelanjaan, sebagai contoh teladan kepada negara".

**( Perdana Menteri )**

12. PR-1321-U60277  
**Dr. Tan Seng Giaw [ Kepong ]** akan mencadangkan:-

"Bahawa Dewan ini menyatakan kadar pembangunan Internet yang terkini di semua aspek berbanding dengan negara seperti Korea Selatan. Apakah jenis pembangunan dan jumlah kosnya serta prestasinya."

**( Menteri Komunikasi dan Multimedia )**

13. PR-1321-U59580

**Tuan Fong Kui Lun [ Bukit Bintang ]** akan mencadangkan:-

"Bahawa Dewan ini menggesa Suruhanjaya Pilihanraya Malaysia dalam proses untuk melaksanakan persempadanan semula kawasan pilihan raya hendaklah memastikan wujud keseimbangan pemilih antara pilihan raya dan mengelak perbuatan menggerimander (gerrymandering) yang merugikan para pemilih."

**( Perdana Menteri )**

14. PR-1321-U59582

**Tuan Fong Kui Lun [ Bukit Bintang ]** akan mencadangkan:-

"Bahawa dewan ini menggesa Kerajaan hendaklah menyalurkan peruntukan tahunan bagi Ahli Parlimen secara adil, baik untuk wakil rakyat BN mahupun wakil rakyat pembangkang sebagaimana cadangan Kerajaan Negeri Pulau Pinang untuk menyalurkan peruntukan yang sama diterima oleh wakil-wakil rakyat pembangkang kepada wakil-wakil rakyat BN mulai tahun 2014."

**( Perdana Menteri )**

15. PR-1321-U60610

**Tuan Liew Chin Tong [ Kluang ]** akan mencadangkan:-

"Bahawa Dewan ini menyokong cadangan menetapkan sebarang pembelian aset atau sistem pertahanan yang melebihi RM100 juta oleh Kementerian Pertahanan, mesti dibawa ke Parlimen untuk dibahas dan diaudit oleh Jabatan Audit Negara untuk syarat meneruskan pembelian ini. Ini juga bertujuan untuk mempertingkatkan integriti dan keberkesanan pembelian sistem pertahanan."

**( Menteri Pertahanan )**

16. PR-1321-U60119

**Tuan Hee Loy Sian [ Petaling Jaya Selatan ]** akan mencadangkan:-

"Bahawa Dewan ini menolak politik samseng dan perkauman serta menggesa perdebatan dasar secara rasional dan tanpa keganasan. Tindakan keganasan beberapa NGO pro-Kerajaan terhadap warganegara biasa dan mengugut bunuh Ahli Dewan Undangan Negeri Macang Bubok Pulau Pinang dan Ahli Parlimen Seputeh telah melanggar undang-undang jenayah Malaysia, oleh yang demikian pihak polis mestilah menyiasat suspek di bawah Kanun Acara Jenayah dengan segera. Biarlah rakyat jelata mendengar penjelasan dalam satu perdebatan yang sihat dan dengan ini Malaysia akan mengorak langkah ke satu kebudayaan demokrasi yang lebih matang. Maka dengan ini Dewan hendaklah mengambil ketetapan untuk meminta Kerajaan melalui Peguam Negara untuk mengambil tindakan tegas terhadap pihak yang cuba meniupkan unsur perkauman dalam agenda politik mereka."

**( Perdana Menteri )**

17. PR-1321-U60120

**Tuan Hee Loy Sian [ Petaling Jaya Selatan ]** akan mencadangkan:-

"Bahawa Dewan ini mendesak Kerajaan menubuhkan mahkamah koroner yang tetap, bebas dan profesional bagi menjalankan inkues bagi semua kes kematian di bawah agensi-agensi penguatkuasaan undang-undang."

**( Perdana Menteri )**

18. PR-1321-U61176

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan mempertimbangkan cadangan untuk kes kematian di bawah tahanan Polis Diraja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan. "

**(Menteri Dalam Negeri )**

19. PR-1321-U61180

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gegala sosial yang kian meningkat dan berleluasa akibat daripada kegagalan sistem pendidikan di Malaysia."

**( Menteri Pendidikan )**

**RISALAT-RISALAT YANG DIBAWA KE DALAM MESYUARAT  
(DEWAN RAKYAT)**

<b><u>TAHUN 2014</u></b>	<b><u>RISALAT/DOKUMEN</u></b>	<b><u>TARIKH DIBENTANGKAN</u></b>
ST. 23	Laporan Tahunan dan Penyata Kewangan Universiti Tun Hussein Onn Malaysia (UTHM) Bagi Tahun 2012	24 Mac 2014
ST. 24	Laporan Tahunan dan Penyata Kewangan Universiti Sains Islam Malaysia (USIM) Bagi Tahun 2012	24 Mac 2014
ST. 25	Laporan Tahunan dan Penyata Kewangan Perbadanan Tabung Pendidikan Tinggi Nasional (PTPTN) Bagi Tahun 2012	24 Mac 2014
ST.35	Penyata Keluaran Wang Daripada Simpanan Luar Jangka Bagi Tempoh Dari 1 Januari 2013 hingga 31 Disember 2013 Menurut Peraturan Seksyen 6 (3) Akta Kumpulan Wang Pembangunan 1966.	24 Mac 2014
CMD.1	Anggaran Perbelanjaan Mengurus Tambahan Kedua, 2013	24 Mac 2014
CMD. 1A	Memorandum Perbendaharaan Mengenai Anggaran Perbelanjaan Mengurus Tambahan Kedua, 2013 Bagi Kerajaan Malaysia	24 Mac 2014
CMD. 2	Anggaran Perbelanjaan Pembangunan Tambahan Pertama, 2013	24 Mac 2014
CMD. 2A	Memorandum Perbendaharaan Mengenai Anggaran Perbelanjaan Pembangunan Tambahan Pertama, 2013 Bagi Kerajaan Malaysia	24 Mac 2014
CMD. 3	Penyata Keluaran Wang Daripada Kumpulan Wang Luar Jangka Bagi Tempoh 1 Januari 2013 Hingga 31 Disember 2013, Menurut Peraturan 68 di bawah Peraturan-peraturan Majlis Mesyuarat Dewan Rakyat	24 Mac 2014